



SYNOD Newsletter

Volume XXVI

No. 343

E-mail : synodnews@gmail.com

April, 2012

SYNOD SUM DINHMUN THAR TIHCHHUAH A NI TA

1 st April, 2011 - 31 st March, 2012 chhunga hmuh beisei (Budget)	₹ 75,34,11,300/-
1 st April, 2011 - 31 st March, 2012 chhunga hmuh zawng zawng	₹ 94,57,88,830/-
Budget aia hmuh tamna (Budget khûmna)	₹ 19,23,77,530/-

Synod Finance Department-in kum tina a tih thin angin Mizoram Presbyterian Kohhran Synod Tangka Kum (Financial Year) tawp, March 31, 2012 khan kum khat chhunga Mizoram Presbyterian Kohhran Synod sum dinhmun thar a tichhuak leh ta a; a pum puia hmuh zawng zawng chu ₹ 94,57,88,830/- a ni a; kum 2011-2012 chhunga hmuh beisei (Budget) ₹ 75,34,11,300/- chu ₹ 19,23,77,530/- zetin khûm a ni a, kum kal taa sum hmuh ₹ 72,30,34,339/- pawh ₹ 22,27,54,491/- lain khûm a ni bawh. Kum hmasa khumna hi za zelah 30.81 lai a ni a, hriat theih chinah kum hmasa khûmna san ber tum a ni. Pathian hnena thilpek hi Kohhran chhungkaw tinten Pathian kan biakna, A tana kan inpekna hmuh theiha lantirtu pawimawh tak a nih avangin hemi lama hmasawna hi Kohhran than zelnalantirtua ngaih a ni thin.



Hlawm hrang hranga sum hmuh dan chu hetiang a ni:

Budget Head	Apr.'11 - Mar '12 chhunga hmuh	Budget khumna (+) /Phak lohna (-)	Hmuh zat percent
1. PASTORAL			
1. Pathian Ram			
1) Pathian Ram	40,94,67,633	(+) 9,92,53,533	132.00
2) Buhfaitham	8,68,37,566	(+) 1,68,37,566	124.05
3) Sakramen	33,86,280	(+) 12,06,280	155.33
4) Sunday School	30,20,206	(+) 6,20,206	125.84
5) Inneihna	1,74,158	(+) 44,158	133.97
Total	50,28,85,843	(+) 11,79,61,743	130.65
Designated Total	70,17,363	(+) 62,40,863	903.72
Hmuhna dang Total	1,41,70,944	(+) 22,84,944	119.22
Pastoral Grand Total	52,40,74,150	(+) 12,64,87,550	131.81
2. MISSION			
1) Ramthar	27,38,04,159	(+) 4,27,25,259	118.49
2) Thawktu chawmna	13,28,82,567	(+) 1,97,32,567	117.44
Total	40,66,86,726	(+) 6,24,57,826	118.14
Hmuhna dang Total	1,50,27,954	(+) 34,32,154	129.60
Mission Grand Total	42,17,14,680	(+) 6,58,89,980	118.52
Hmuh zawng zawng	94,57,88,830	(+) 19,23,77,530	125.53

Hmun a chep deuh avangin April 2011 - March 2012 Budget tihlan a ni lo va, Budget chu hmuh zat atanga budget khumna pah hi a ni. Pathian Ram tih chhungah hian Thawhlawm Ipa Pathian Ram bakah Buhfaitham atanga hmuh te, Sakramen Inkhawm Thawhlawm te, Sunday School zawmna te, Inneiten Certificate man an pek te tarlan hmasak phawt a ni a. Designated tih hi Synod Endowment Fund te, Damdawi In Charity Fund te, ram pawn atanga dawn te a ni a; hmuhna dang tih hi in luah man leh Bank-a a pung te leh thil chi hrang hrang atanga hmuh a ni.

Mission tih hnuai Ramthar tih hi Thawhlawm Ipa Ramthar tih atanga hmuh a ni a, Thawktu chawmna chu Kohhran, Bial, Kohhran Hmeichhia leh K.T.P-ten missionary pakhat Rs.1,000/- hisap zela an chawmna tling khawm a ni.

“A awm sa atanga budget siam lovin rinnain Synod Budget hi siam a ni thin a, kum hmasa lama sum hmuh leh hman dan zul zuiin budget hi siam a ni ber a; kum tawpa budget khum a ni leh mai thin hi Pathian hnathawh ropui tak a ni,” tiin, thilpek petu chhungkaw tin chungah Synod aiawhin Synod Finance Officer Rev. Zosangliana Colney-in lawmthu a sawi a ni.



SYNOD NEWSLETTER

Editorial Staff

Rev. K. Lalpiangthara Rev. B. Lalnghakliana
Upa H. Ronghaka Upa C.H. Thangkhuma

Editorial 

THLEN CHIN ATANG HMASAWN

Synod Executive Committee-in min phalsak angin Synod Newsletter pawhin hmel thar a rawn chhuah ta! Synod-in hma kan lakna kawng hrang hrangah Pathian hruaina kan dawng a, hmasawn zawngin ke kan pen zel a, a lawmawm tak zet zet a ni. Kan Chanchinbuin hmel thar a rawn pu ta pawh hi hma lam panin Synod kan zel tih tarlangtu chiang tak a ni kan ti thei ang.

Nungcha kan tihhote hi Pathianin a siam dan ang angin vawin thlengin a tam ber chu an la nung ve hlawm a; amaherawhchu, an nunzia leh awm danah an hmasawna hmuh tur a vang hle. Tlaiberh te pawh hian Eden huana an bu chheh dan bak kha hma an la sawn chuang lo ni awm tak a ni. Mihringte erawh chuan in sak danah te, ei leh bar dap danah te leh thil dang dangah hma kan sawn zel a, kan sang tual tual a. Hei hian nungchate aia changkang, mak leh danglam bika Pathian siam kan nihzia a tichiang hle.

Hmuh theih lama hma kan sawn zel rual hian thlarau lam nunah leh rawngbawlina kawng hrang hrangah kan thlen chin atanga hmasawn kan tum a pawimawh hlein a lang. Thlarau rah chi hrang hrang pakua, Tirhkoh Paulan min hrilh (Gal.5:22,23) - hmangaihna te, hlimna te, remna te, dawhtheihna te, ngilneihna te, thatna te, rinawmna te, thuhnuairawlhna te leh insumtheihna kawngah te hian kan thlen chin atangin hma kan sawn em aw? Inngaihtlawmna lamah te hian hma kan sawn em? Tawngtai leh Bible chhiar lamah te, thilpek lamah te, zirtir leh thusawi kawngah, damlo kan leh in tlawh chhuah lamah te hian kan thlen chin atangin hma i sawn zel ang u.

BIAL INKHAWMPUI HUN CHUNGCHANGA HRIATTIRNA

Kum 2010-ah khan Presbyterian Church of India (PCI) Assembly nen a innan avang leh kum 2011-ah Easter Sunday nen a innan avangin SEC 228:13 chuan kum 2010 leh 2011 atan Bial Inkhawmpui chu April Pathianni vawi thumna hman turin a rel a. Programme dang nena insu buai a awm loh chuan SEC 223:13-in a lo rel tawh angin Bial Inkhawmpui hun hi kum tinin April Pathianni vawi 4-naa hman tur a ni e.



(UPA D.P. BIAKKHUMA)

Secretary

Mizoram Presbyterian Church

DAN ZAWHKIM HISAPA BIAL THAWH TAM 10

1st April 2011 - 31st March 2012

Sl. No.	Bial hming	DZK zat	Thawh zat	Per DZK
1.	Dawrpui Bial	4,332	3,55,99,337	8,218
2.	Shillong Bial	555	41,27,013	7,436
3.	Kohima Bial	223	15,73,141	7,054
4.	Madanring Bial	990	61,86,070	6,249
5.	Mission Veng Bial	4,327	2,58,64,180	5,977
6.	Ramhlun North Bial	4,892	2,87,90,212	5,885
7.	Chanmari Bial	6,671	3,90,91,761	5,860
8.	Electric Veng Bial	4,795	2,63,08,015	5,487
9.	Khatla Bial	4,909	2,55,07,235	5,196
10.	Chhinga Veng Bial	5,035	2,54,72,977	5,059

DAN ZAWHKIM HISAPA KOHHRAN MAL THAWH TAM 10

1st April 2011 - 31st March 2012

Sl. No.	Kohhran hming	DZK zat	Thawh zat	Per DZK
1.	Duliajan	15	3,25,056	21,670
2.	Dibruagr	8	1,63,036	20,380
3.	Kohima Mizo Kohhran	89	12,03,570	13,523
4.	Zarkawt	1,317	1,58,77,746	12,056
5.	Lawngtlai AOC Veng	19	2,13,448	11,234
6.	Shillong Mizo	351	34,76,262	9,904
7.	Mokokchung	9	78,883	8,765
8.	Damdep - I	9	78,342	8,705
9.	Tuikhuahtlang	783	66,25,523	8,462
10.	Khatla	1,645	1,35,24,548	8,222

BIAL THAWHLAWM THAWH TAM 10

1st April 2011 - 31st March 2012

No.	Bial hming	Thawh zat
1.	Chanmari Bial	3,90,91,761
2.	Dawrpui Bial	3,55,99,337
3.	Ramhlun North Bial	2,87,90,212
4.	Chaltlang Bial	2,74,87,401
5.	Electric Veng Bial	2,63,08,015
6.	Mission Veng Bial	2,58,64,180
7.	Khatla Bial	2,55,07,235
8.	Chhinga Veng Bial	2,54,72,977
9.	Bethlehem Bial	2,12,82,862
10.	Republic Veng Bial	2,01,52,285

KOHHRAN MAL THAWH TAM 10

1st April 2011 - 31st March 2012

No.	Kohhran hming	Thawh zat
1.	Chanmari	2,27,36,927
2.	Ramhlun North	1,77,32,440
3.	Mission Veng	1,59,08,391
4.	Zarkawt	1,58,77,746
5.	Electric Veng	1,53,76,085
6.	Khatla	1,35,24,548
7.	Chanmari West	1,34,77,096
8.	Dawrpui	1,28,00,477
9.	Chhinga Veng	1,26,19,787
10.	Bungkawn	1,19,48,608

NUN DAN CHEWING GUM CENSUS

Kum 20 zet liam tawhah khân Aizawl khawpui chhûng Kohhran lian taka KÏP te chuan an Biak inah Chewing gum chhiarpui an nei a, thil awm zen zen lo a nih avangin rilruah a châm zui duh khawp mai. He chhiarpui nei tur hian KÏP chuan nileng hnatlang kovin Biak In thutthleng hnuaiia chewing gum awm an ziat thla a, an han chhiar chuan 1800 zet a ni.

He chewing gum chhiarpuia hian a tam ber chu thalaiho thutna hnuaiia mi a ni a, naupang thutna hnuaiia pawh tlem azawng chu a awm ve bawk awm e. Thalai lam kan inbih chian a ngai. Biak In fel fai leh thianglim kan duh a, chutih laia a ruka ei tur pai lût tam ber chu thalai kan ni a; Biak In kiang hmun remchang din khawm theihnaa kuhva eina pânhnah them leh cigarettes bung thla niai nuai thin hi a tam ber chu thalaite paih a ni ngeiin a lang tlat! Biak Ina Cigarettes bâwm leh kuhva fun hum luh tut tut a mawi lo tluk thovin iptêa ah luh pawh a inhmeh chuang lo. Biak In leh a vel vawn thianglimna kawngah hian Kohhranhovin tan kan lak thar a ngai hle.

Biak In hi chhangchhe bawng-bawra kan lawina hmun tur ni mah se ei tur ken luhna tur a ni lo tih hi kan hriat tel a ngai. Biak in chhungah hian Lalpa Zanriah bak ei a ni ngai lo tih hi kan inzirtir a tul a, kan tu leh fate pawh Biak in chhunga thil ei lo tur leh a pawn lam tihnawk lo tura zirtir an ngai hle. Biak In vawn thianglim leh vawn up lam kan thlahthlam rualin puithuna leh Biak In zahawmna kan tinep hret hret tih hriat tel a ngai a ni.

Biak In hi mihringin Pathian kan pawlna hmun Pathian biakna In thianglim a nih avangin a zahawm a, khawvel hmasawnnain min pal bawrh bawrh lai hian Biak in hlutna te, a zahawmna leh thianglimna vawng him tura tan mar pat a ngai tih erawh inhrilh nawn a tul ta hle mai! (CHT)

PCI GENERAL ASSEMBLY

Kum khat dana hman thin India ram Presbyterian Kohhran (*Presbyterian Church of India*) Inkhawmpui Lian chu May 3 - 6, 2012 chung khian Champhai Vengsang Kohhran Biak Inah hman a ni dawn. Moderator Rev. S.I. Iawphniaw, KJP Synod Sepngi a ni ang a, Secretaries Rev. Lallarmawia Manipur Synod leh Rev. Zosangliana Colney, Mizo Synod an ni ang.

Minister/Pastor leh Probationary Pastor-te chu palai ni sa an ni a, Presbytery tin atangin palai thlan panga theuh an awm bawk. Palai ni sa, he Inkhawmpuia kal thei turte chu Synod Office-ah a hma lamin inhriattir tur a ni a; Mizoram Synod atanga palaite hi May 3, 2012 zing lam dar 9:00-ah Synod Office kawt atanga chhuah tur a ni a; a kal turte tlai lo tura beisei an ni.



Mite chuan beidawng hmêl pu tak hian Thawhtanni tûkah Râl Vêngtu râl ven bûk lam an va pan dam dam a. Râl Vêngtu chuan eng vanga beidawng hmêl pu nge an nih a lo zawt a, mite chuan, "Nimin chawhmaa Kohhran Upa kan inthlannaah tu mah kan thlang tling lo pek a, a beidawn thlâk ta tak zet zet a ni," tiin an chhâng a.

Râl Vêngtu chuan, "Heti hian ka thil hriat chanchin ka'n hrih teh ang che u, 'Khaw pakhata Kohhran pakhat pawh hi inpumkhatna tha tak nei anga an lan laiin Upa thlang tling har zâwngin an khawsa a. Mual khata an tlatpui theih tur nia an hriatte theuh an thlang thin a. Nuhovin Kristian chhungkaw lam an sawipui theih tur leh an lâmpui theih te chauh tha ber turah an ngai a, thalaihovin thalai rilru pu pha tur naupang lam deuh an rilruah an dah bawk si a, pavalaiho lah in an pâwl tuipui thei tur lam an âwn ru ve ngawt zel bawk si a, an inthlang tling thei rêng rêng hlei nê'm' hetiang rilru in pu ve a nih chuan in inthlang tling ngai lo vang.

"Tun aţang chuan mahni hma ringawt sial hlawn lovin Kohhran hma lo sial tawh zâwk ula. Chuta ţang chuan in zavaia tâna mamawh tur in thlang tling nawlh nawlh tawh mai dawn alawm ! Tun aţang chuan mahni hma aiin Kohhran leh mi dang hma in lo ngai tawh zâwk dawn nia," tiin thu a fah ta mawlh mawlh mai a. Mite chuan, "A ni tak ang a, Upa thlan leh dawnah chuan Râl Vêngtu thurawn anga ngaih dân kan siam thiam theih nan *awareness campaign* pawh neih nghe nghe tur a nih hi. Râl Vêngtu thurawn nge nge a fîng thin e," tiin hûm hawn tha tak neia inhriain an tîn ta dam dam a.

NEICC PLATINUM JUBILEE

India Hmarchhaka Kohhran leh Kristian pawl hrang hrang telna, North East India Christian Council (NEICC) kum 75-na (Platinum Jubilee) lawm pahin May 16 -20, 2012 chhung khian Rymbai, Meghalaya-ah Inkhawmpui hman a ni dawn a. Jubilee lawm kum a nih dawn avangin kuminah hian Mizoram Synod aţangin palai 60 intirh tur a ni a, Mizoram chhung Presbytery-te leh ZPP aţangin palai inruat a ni ang.

Mizoram Synod aţanga palai kal turte chu May 16, 2012 zing lam dar 9:00-ah Synod Office kawt aţangin chhuah tur a ni a, hriattirna hran dawng lo palh pawhin hei hi hriattirnaa ngaih tur a nih thu Superintendent, Synod Office aţangin kan dawng.

ZAWHNA LEH CHHANNA

C.Vanlalrova, Laipuitlang zawhna

2011 Synod Inkhawmpui Agenda zinga pakhat WCC zawm leh zawm loh chungchang ngaihtuahnaah khan 'zawm rih loh ni se' tiin thutlukna siam niin ka lo hria a. WCC-ah hian Mizoram Synod hi Associate Member kan ni em ? Tin, mi thenkhat hian WCC hi sakawlhah an ngai tlat a, hemi chungchang hi chiang takin Kohhran mipuite chhiar theih turin Synod News Letter-ah sawifiahna siam ni se a tha viau lawng maw?

Chhanna : World Council of Churches (WCC) zawm leh zawm loh chungchang hi Synod Inkhawmpui 2010 Gen.77-ah khan, "Presbytery tinah sawi ho phawt ni se, Presbytery hrang hrangte ngaih dan Synod-ah thlir leh ni rawh se kan ti," tia rel a lo ni tawh a. Presbytery hrang hrangte ngaih dan lak khawmah khan WCC zawm tha ti Presbytery zat - 14 an nih laiin zawm tha ti lo Presbytery 29 an awm thung a. WCC zawm duh lotu an tam zawk avang hian rem kan la tih loh thu PCI General Assembly-ah thlen ni se, tiin rel a ni ta a ni.

WCC-ah hian Mizoram Synod hi Associate Member a ni lo va, nih a hnêkin Presbyterian Church of India (PCI) ngei pawhin zawm leh zawm loh chungchangah Synod hrang hrang ngaih dan a la khawn khawm mek chauh a la ni. National Council of Churches in India (NCCI) hi WCC-ah Associate Member pakhat chu a ni ve a. NCCI-ah hian PCI General Assembly angin kan tel ve a. Direct-in Presbyterian Church of India hian WCC hi zawmna a la nei lo. PCI General Assembly May 2-6, 2012-a Champhai Vengsang Biak ina neih hunah Synod hrang hrang ngaih dan aţangin thutlukna a la siam dawn a ni.

WCC hi kan zawm avanga kan hlawkpui viauna tur emaw kan zawm loh avanga thil pawl tak thleng tur emaw a awm chuangin a lang lem lo. Chutiangin kan zawm avanga a pawl viauna tur leh kan zawm loh avanga a that viauna tur teh vak a awmin a lang lo. Amaherawh-chu, Kohhran pawl tenau zawkten an lo hmuh sakawlh laklawh tawh avang leh kan mite ngei pawh bum kaw mai mai theih tawk an awm ve thin avangin ngaih dan zau deuh zawk kan neih tlan theih hma chuan kan la zawm loh phawt hi a tha zawk dawn pawh a ni mai thei e, Pathianin PCI General Assembly hmangin a duh dan min hriattir mai turah i ngai ang.

SHSS HRIATTIRNA

Synod Higher Secondary School Class XI luh tum tan Admission Form a lak theih tawh a, Dt. 25.4.2012 thleng theh luh theih a ni a, Dt. 30.4.2012-ah interview tur a ni.

SYNOD HOSPITAL, DURTLANG MARCH, 2012 CHHUNGA THILPEK DAWNTE

I. CHARITY FUND (In Rupees)

1. Lunglei Ramthar Presbyterian Kohhran, Lunglei	5,120/-
2. Teikhang Bial Kohhran Hmeichhia	1,000/-
3. Tlabung Zodin Bial Kohhran Hmeichhia	1,500/-
4. Pu Lalnunsanga, Durtlang Dawrkawn	1,000/-
5. Pu Hualhnuna, Sihphir Venghlun	1,000/-
6. Pu Lalawmpuia, Durtlang Mel 5	2,000/-
7. Tlabung Chawnpui Bial Kohhran Hmeichhia	2,000/-
8. Khawlailung Bial Kohhran Hmeichhia	5,000/-
9. Pu Joseph Lalrinsailova, Director, Postal Services	2,000/-
10. Rangvamual Presbyterian Kohhran Hmeichhia	2,000/-
11. Sesawng Presbyterian Kohhran Hmeichhia	2,000/-
12. Sesawng Bial Kohhran Hmeichhia	2,000/-
13. KTP, Thenzawl Bial	2,000/-
14. Pu Lalnunsanga, Durtlang Dawrkawn	1,000/-
15. Pi Sangkimi, Khatla, Aizawl	5,000/-
16. Life Drug Centre, Upper Bazar, Aizawl	11,000/-
17. Lallen Bial Kohhran Hmeichhia	5,000/-
18. Pu Lalnunsanga Hahnar, MRP, Saikhamakawn	1,000/-
19. KTP, Vathuampui Bial	1,000/-
20. Pu B. Lalzela, Venghlui, Aizawl	20,000/-
21. KTP, Kangmun Bial	2,000/-
22. Pu C. Vanlalliana, Sakawrtuichhun	1,000/-
23. Pu Rothuama & Fly., Chanmari West	4,000/-
TOTAL	79,620/-

II. THISEN PETE

	UNIT PEK ZAT
1. KTP, Darlung Bial*	53 Units
1. YMA, Chanmari West Branch	114 Units
2. KTP, Himali Branch Church	14 Units
3. KTP, Tuikual South Branch	28 Units
4. KTP, Maubawk Bial	44 Units
5. MZU Social Works Dept. Student	16 Units
6. KTP, Reiek Branch	61 Units
7. KTP, Chhinga Veng Branch	77 Units
TOTAL	354 Units

*Issue hmasa-aa 'KTP, Durtlang Bial' tih kha Darlung tih zawk tur a ni e.

III. THILDANG PETE

1. Dawrpui Vengthar West Kohhran Hmeichhia - Hmunphiah 100 leh swabstick thahnem tak
2. KTP, Zawlnuam Bial - Plastic chair 6
3. Ratu Bial Kohhran Hmeichhia - Hmunphiah 100
4. Sacrament Department, Tumpui Kohhran, Kolasib - Rs. 1,180/-
5. Tiauzau Branch Church, Hortoki Pastor Bial - Hmunphiah 15 & Maipawl 8
6. Upa C. Hrangsavunga, Champhai Venglai - RL - 7, Dextrose - 1
7. Upa Zoliana Royte, Khatla - Lehkhabu 4
8. Leitan Bial Kohhran Hmeichhia - Thuthlengsei ngenchhan nei 1 (cushion telin)
9. KTP, Bungtlang South Bial - Swabstick thahnem tak
10. Bungtlang South Bial Kohhran Hmeichhia - Hmunphiah 25
11. Hmuntha Bial Kohhran Hmeichhia - Hmunphiah thahnem tak
12. Hualngohmun Kohhran - Rs. 1,000/-
13. KTP, Saichal Branch - Hmunphiah 154
14. Kawnpui Dinthar Kohhran Hmeichhia - Hmunphiah 144

Khawngaihna leh duhsakna avanga kan Lalpa Isua Krista hminga thilpek min petu zawng zawngte hnenah Isua Krista hmingin lawmthu kan sawi tak meuh meuh a ni e.


(Dr. LALREMTANGA)
Director,
Synod Hospital



Hmuntha Kohhran chuan Dt. 24.1.12 - 9.2.2012 chung khan Dinthar lehna Team Speaker, Tv. C. Zairemmawia leh a Team te ruain Crusade leh Camping an nei a. Kohhran dang - IKK, a sen leh a var te, UPC leh Israel atang tein mi eng emaw zat an lo lut a. Crusade leh Camping hlawhtling tak an nei a; Pathian chawimawi nan mi pathum laiin vawk an thawh a, ar leh pawisa leh thilpek chi hrang hrang eng emaw zat an dawng baw. Khawtlang huapin Pathian chawimawina hun hman a ni. Ruihhlo ngai leh Biak In hnaih ngai loten inkhawm an ngai pawimawh a, Pathian huat zawng thil tha lo an kaw te hal ral a ni. Khawtlang boruak pawh a nuam hle.

Lungphunlian Kohhran chuan March 3 - 18, 2012 chung khan Pu K. Dohleia, Synod Revival Team Speaker leh a thiante ruain Crusade leh camping an buatsaih a. Salvation Army atangin mi 52 lai an lut ve a. Rawngbawltu Camp leh Naupang lang Camp an nei baw a; Pathian Thlarau Thianghlim pawl tharna changin hlim takin hun an hmang a ni.

CTI Ramthar Kohhran chuan ni 24-26 Feb., 2012 khan Mi Lungngaite Thian Team Speaker, Pu F. Hmingthansanga ruain Crusade an buatsaih a. An khawtlangin Thlarau lam hartharna nasa tak an chang a, an lawm hle. CTI Kohhran pawhin Biak In kharin he Crusade hi an chhim a, Kohhranhoten an hlawkpui hle.

Serchhip Hmar veng Kohhran chuan January 24 atanga - March 5, 2012 chung khan Tv. C. Lalchullova, Gospel Logos Team Speaker ruain Camping chhawng sarih an buatsaih a, campers 721 lai an lut. Siam thar lehna chang te, piangthara zu zawrh bansante eng emaw zat an awm a; Kohhranah Thlarau Thianghlima hartharna a thlang a, Serchhip khawpui chung a nghawr nghing hle. Camp atana sum senso pawh Kohhran mite kaltlangin hmuh zel a ni. Camp chhawng ngana hman hnuin Kohhranin February 25, 2012 khan Pathian chawimawina hun an hmang a, mihring sang chuang zetin ruai an theh. Kohhranhoten Pathian hnathawh ropui an ti hle.

Tiangmawi Kohhran chuan March 3 - 18, 2012 chung khan Upa L.H. Rohmingliana, Evangelistic Team Speaker ruain Revival Camping chhawng hnih leh naupang lang Camp an buatsaih a. Kohhranah hartharlehna a thlang nasa hle. Dt. 17.3.12 khan Kohhranin lawmthu sawina ruai an buatsaih a, Kohhranho an phur hle.

SERAMPORE COLLEGE PRINCIPAL-AH PROF. TLUANGTEA



India rama College hlun ber zinga mi, Pathian thu zirna lamah phei chuan India rama a hmahruaitu leh khai khawmtu ber Senate of Serampore College (University)-a Principal, Rev. Dr. Lalchungnunga pension-a a chhuah tak avangin he hmunah hian Mizo pa baw, Upa Prof. Laltluangliana Khiangte lak a ni. May thla tir khian a hna hi a zawm dawn niin thu kan dawng.

CSI BISHOP LEH AN KAWPPUITE INTUAI THARNA

Church of South India (CSI) Bishop 15 leh an nupuite bakah CSI Synod official dang paruk, an zavaiin mi 36 te chuan anmahnia senso intum vekin March 26&27, 2012 khan Aizawl-ah Intuai tharna (*Retreat*) an rawn hmang. CSI hian intuai tharnaa kalte lo buaipui tura Mizoram Presbyterian Kohhran Synod an rawn ngen angin Synod-in a lo mikhual a, Tourist Lodge, Chaltlang thlentir an ni. Synod OM chuan Synod hminga thlengtu chan chang turin Chaltlang Kohhran a ruat chhawng leh a, anni hian Retreat atana thil tul chi hrang hrang an lo buaipui a ni. Mikhualte lo enkawl chungchanga mawhpur turin Committee hran siam a ni baw.




CSI Bishop-te hian Intuai tharna hun hmang tur hian March 24 (Inrinni)-ah Aizawl an lo thlang a, a tuk March 25 (Pathianni)-ah Aizawl khawpui chung Kohhran hrang hrangah insem darhin Sunday School leh Zan Inkhawm an chhim a, chibai bukna thu sawitir an ni hlawm. Retreat ni hnihna, March 27-ah Centenary Hall, Chaltlang Kohhranah Mizoram Synod Moderator's Dinner & Cultural Evening programme hman nghal a ni a, hnam lam entir tura sawm, Chaltlang Lily Veng Cultural Club chuan Sarlamkai, Darbu tum leh Cheraw te thiam takin an entir a. Mizoram Synod Choir an zai baw. He hun hi Rev. Zosangliana Colney, Synod Executive Secretary-in kaihruiin inhmelhriattirna leh mikhualte lawmna thu a sawi a, Synod Moderator Rev. Thangzauvan mikhualte lo lawmna leh thuchah tawi a sawi zawhin Mizoram Synod ngaihhuina thilpek a hlan theuh a ni. Hemi hnu hian Mizoram Synod rawngbawlina hrang hrang video thlir ho a ni a, Retreat Convener, Rt. Rev. Dr. J.S. Sadananda-a'n malsawmna sawiin zanriah kil ho nghal a ni.

Retreat hmangtute hian March 28 (Nilaini) khan Mizo hnam ziarang hmuh theihna tur hmun pawimawh leh Kohhran hmun pawimawhte an tlawh kual a, March 29 (Ningani) khan Aizawl an chhuahsan leh a ni. Mizoram Presbyterian Kohhran inrelbawl dan leh inthlun khawm dan chu ropui an ti a, Kohhran chakna hnar niin an hria a; Pathian biak inkhawma an telna hrang hrang pawh hlimawm hlein an hria a, hlawkna tam tak puak chhuah tur an hmuh thu an sawi hlawm. Mizoram boruak nuam an tihzia leh a ram hmelmhang hrim hrim mawi an tihzia an sawi uar hle.

BEISEINA LEH NGENNA

Synod Newsletter hi chungkaw tam berin an hmuh that viau laiin chungkaw thenkhatin an hmu tha vak lo niin a lang a. Editorial Staff Meeting chuan Kohhran Upate leh Tual Upate ngeiin an bial chungah sem thei hram se a duh khawp mai a. Bialtu Upaten an sem thei ziah lo a nih pawhin Finance Committee member-te emaw, rawngbawltu pawimawh chin talin thahnemngai takin sem hram turin kan inngenin kan inbeisei a ni. Tin, a remchan anga Kohhran unau dangte han sem ve zawk te pawh inthlaurung lem lo ila a tha ang e.

SL&PB LEHKHABU THAR NUMBERS HRILHFIAHNA (Gospel Centenary Project)



Kumin 2012 Puitling Sunday School zirlai puitu atana tha fahran, SL&PB Gospel Centenary Project, Thuthlung Hlui Hrilhfiahna **NUMBERS**, Rev. R. Lalthanmawia ziak a lo chhuak ta. Synod Bookroom Hqrs. leh Branch hrang hrangah lei theihin a awm.

A man Rs.65/-